

आकाशवाणीखबरां

1. केंद्री मंत्रीमंडल नै दिक्ती केंद्री कर्मचारियें दे महंगाई भत्तें गी 3 फीसद बढ़ाने दी मंजूरी।
2. प्रधानमंत्री नरेंद्र मोदी होरें आखेआ जे आर.एस.एस नै राश्ट्र सेवा ते समाज गी सशक्त बनाने लेई अनथक प्रयास कीते न, प्रधानमंत्री होर नमीं दिल्ली च आर.एस.एस दी शताब्दी समारोह च शामिल होए।
3. आर.बी.आई नै चालू माली बरे लेई जीडीपी वृद्धि दा अनुमान 6.8 फीसद लाया ते चालू माली बरे लेई मुद्रास्फीति दा अनुमान बी 2.6 फीसद रक्खेआ जेडा जे पैहले दे अनुमान थमां घट्ट ऐ।
4. रक्षामंत्री राजनाथ सिंह होरें आखेआ जे जीएसटी दरें च कमी थमां रक्षा क्षेत्र च मती खरीद गी बढ़ावा थहोग।
5. अमरीकी कांग्रेस च रिपब्लिकन ते डेमोक्रेट्स वित्त विधेयक पर सहमति बनाने च असफल, सरकार आधिकारिक तौरा पर ठप। राष्ट्रपति डोनाल्ड ट्रम्प होरें चेतावनी दिक्ती जे ओहू इस माली सैंकट दा इस्तेमाल सरकारी कर्मचारियें दी छंटनी लेई करी सकदे न।
6. महानवमी मुलुखे दे बक्ख-बक्ख हिस्सें च मनाई जा'रदी ऐ।

<><><><><><>

Cabinet-Decisions

केंद्री मंत्रीमंडल नै केंद्र सरकार दे कर्मचारियें लेई डी.ए ते पेंशनरें ताई डी.आर च 3 प्रतिशत दे बाढ़े गी मंजूरी दिक्ती ऐ। अज्ज नमीं दिल्ली च कैबिनेट बैठक मगरा मीडिया गी जानकारी दिंदे होई सूचना ते प्रसारण मंत्री अश्विनी वैश्व होरें आखेआ जे एहदे कन्नै तकरीबन 49 लख 20 जहार केंद्र सरकार दे कर्मचारियें ते 68 लख 70 जहार पेंशनरें गी लाहू पुज्जोग। उनें दस्सेआ जे नमीं दर इस बरे दी पैहली जुलाई थमां लागू होग। केंद्री मंत्रीमंडल दी आर्थिक मामलें दी समिति नै देश भरै च 5 जहार 862 करोड़ रपे शां मते परिव्यय कन्नै 57 नमें केंद्री विद्यालय खोलने दी मंजूरी देई दिक्ती ऐ। केंद्री सूचना ते प्रसारण मंत्री अश्विनी वैश्व होरें दस्सेआ जे जिनें जिलें च कोई बी केंद्री विद्यालय नेई ऐ, उत्थे 20 केंद्री विद्यालय खोले जाडन। केंद्री मंत्रीमंडल नै दालें च आत्मनिर्भरता मिशन गी मंजूरी देई दिक्ती ऐ। घरेलू उत्पादन गी बढ़ावा देने ते दालें च आत्मनिर्भरता हासल करने दे मकसद कन्नै एहू इक ऐतिहासिक पहल ऐ। एहू मिशन 2025-26 थमां 2030-31 तोड़ी 6 बरें दी अवधि च 11 जहार 440 करोड़ रपे दे माली परिव्यय कन्नै लागू कीता जाग। भारत दी फसल प्रणालियें ते आहार च दालें दा विशेष महत्व ऐ। केंद्री मंत्री अश्विनी वैश्व होरें आखेआ जे सरकार नै करसानें गी उंदी उपज दा लाहकारी मूल्य यकीनी करने लेई रबी फसलें दे एमएसपी च वृद्धि कीती ऐ। सब्बनं शा बद् वृद्धि सूरजमुखी लेई 600 रपे फही क्विंटल ते मसूर लेई 300 रपे फही क्विंटल कीती गेई ऐ।

<><><><><><>

PM-RSS

प्रधानमंत्री नरेंद्र मोदी होर नमी दिल्ली च राश्ट्री स्वयंसेवक संघ दे शताब्दी समारोह च शामिल होए। शताब्दी समारोह आरएसएस दी विरासत, संघ दे सांस्कृतिक योगदान ते देश दी एकता च संघ दी भूमिका गी दर्शादा ऐ। इस मौके पर अपने संबोधन च प्रधानमंत्री होरें आखेआ जे आरएसएस राश्ट्र निर्माण लेई कार्यरत न। उनें आखेआ जे 100 बरे पैहले अज्ज दे गै दिन इक संगठन दे रूपै च आरएसएस दी स्थापना मात्र इक संयोग नेई हा बल्के एहू जहारें बरें थमां चली आ'रदी इक परम्परा दा पुनास्थापन हा। इस मौके पर श्री मोदी होरें इक विशेष स्मारक डाक टिकट ते सिक्का बी जारी कीता।

<><><><><><>

RBI

भारती रिजर्व बैंक नै चालू माली बरे लेई अपने सकल घरेलू उत्पाद दे वृद्धि अनुमानें गी संशोधित करिये 6 अशारिया 8 फीसद करी दिक्ता ऐ। इनें चालू माली बरें लेई मुद्रास्फीति दा अनुमान बी 2.6 फीसद रक्खेआ ऐ जेडा पैहले दे अनुमान शां घट्ट ऐ। इस बरे अगस्त च भारती रिजर्व बैंक नै माली बरे 2025-26 लेई 6.5 फीसद जीडीपी वृद्धि दर ते 3.1 फीसद मुद्रास्फीति दा अनुमान व्यक्त कीता हा। आरबीआई नै ब्याज दरें गी बदलेआ नेई ऐ। आरबीआई गवर्नर संजय मल्होत्रा होरें अज्ज मुम्बई च चालू माली बरें दी चौथी द्विमासिक मौद्रिक नीति दी

घोशणा कीती। मल्होत्रा होरें आखेआ जे आर.बी.आई नै अपनी रेपो दर गी 5.5 फीसद पर नेई बदलने दा फैसला लैता। उनें आखेआ जे मौद्रिक नीति समिति नै सर्वसम्मति कब्रै नीतिगत रेपो दर गी नेई बदलने लेई मतदान कीता।

<><><><><><>

Rajnath GST

रक्षा मंत्री राजनाथ सिंह होरें आखेआ जे सरकार आसेआ वस्तु ते सेवा कर (जीएसटी) कर दरें गी युक्तिसंगत बनाने दा रक्षा क्षेत्र च खरीद पर सिद्धा असर पौग। उनें इसी इक प्रगतिशील गैँड दस्सदे होई आखेआ जे जीएसटी दरें च कमी थमां मती खरीद संभव होई सकोग। श्री सिंह होरें अज्ज नमीं दिल्ली च रक्षा लेखा विभाग दिवस 2025 समारोह गी संबोधित करदे होई एहू गल्ल आक्खी। रक्षा मंत्री होरें रक्षा क्षेत्र च अनुसंधान ते विकास आधारित प्रौद्योगिकयें गी बढ़ावा देने लेई देश च इक नवाचार इको सिस्टम बनाने दा आह्वान कीता।

<><><><><><>

GST-Handicraft

अगली पीढ़ी दे जीएसटी सुधारें तैहत सरकारै बपारियें कारीगरें ते गाहकें प महंगाई दा भार घट्ट करने दे मकसद कब्रै हस्तशिल्प क्षेत्र च टैक्स दियें दरें गी घट्ट कीता ऐ। चीनी मिट्टी दे भांडे-बर्तनें, सने टेराकोटा ते रसोई दे होरनें भांडें पर जीएसटी दी दर 12 प्रतिशत थमां घटाइयै 5 प्रतिशत करी दित्ती ऐ। मूर्तियें, सजावटी चीनी मिट्टी ते नीली मिट्टी दे भांडे, शीशें ते एहदे कब्रै बनी दियें कलाकृतियें पर जीएसटी हुन 5 प्रतिशत ऐ। पैहले एहदी दर 12 प्रतिशत ही। इस गैँड दा मकसद लोडचदियें घरेलू चीजें-बस्तें गी मता किफायती बनाना ते भारत दे रिवायती हस्तशिल्प दी मंग गी बढ़ावा देना ऐ जेदे कब्रै कारीगरें गी प्रोत्साहन थ्योग ते देस भरै दे विरासती शिल्प बजारें गी मजबूती मिलोग।

<><><><><><>

Sewa Parv Global South

चला करदी टकोहदी श्रृंखला सेवा पर्व तैहत अज्ज अस थोआड़ा ध्यान इस गल्ला पर दोआ करने आं जे मोदी सरकारै किस चाल्ली वैश्विक सांझेदारियें गी ना शड़ा तगड़ा कीता, सगुआं भारत गी विश्व मंच पर इक मजबूत अवाज बी बनाया। प्रधानमंत्री नरेंद्र मोदी हुंदी नुमायंदगी च भारत दी वैश्विक हिस्सेदारी नमियें उंचाइयें पर पुज्जी ऐ ते समूलची दुनिया दे मामलें गी शकल देने च एहदी भूमिका बी मजबूत होई ऐ। ग्लोबल साउथ बक्खी भारत दा समर्थन ते अफ्रीकी संघ गी जी-20 च शामिल करने ज्नेई कोश्टां इक्क बहुपक्षी विश्व बक्खी औंदी बचनबद्धता गी दस्सदे ना। ब्रिक्स क्लाइ ते एस.सी.ओ च सक्रिय तौरा पर शामिल होइये भारत सुरक्षा, प्रौद्योगिकी ते आतंकवाद रोधी सहयोग गी बढ़ावा दिंदे होई रणनीतिक खुदमुखतेयारी गी सामा बना करदा ऐ। प्रधानमंत्री मोदी हुंदी दुनिया भर दियें यात्राएं भारत दी अंतरराष्ट्री सांझेदारियें ते असर गी बढ़ाया ऐ।

<><><><><><>

US-Tariff

पिछले 7 बरें च अज्ज पेहली बारी अमरीकी सरकार आधिकारिक तौरा पर ठप होई गई ऐ। एहू हालात उसलै बनी गे जिसलै अमरीकी कांग्रेस च रिपब्लिकन ते डेमोक्रेट्स वित्थ विधेयक पर सहमति बनाने च विफल रेही। डेमोक्रेट्स नै साफ कीता ऐ जे ओहू रिपब्लिकन दे माली विधेयक दा बी समर्थन करंगन जिसले तोड़ी उनेंगी स्वास्थ सेवा सरबन्धी कई रियायतां नेई थ्योई जंदियां। मकामी समें मताबक अही रातीं थमां शुरू होए दे इस बंद करी किश अमरीकी सरकारी सेवा अस्थाई रूपै नै ठप होई जांगन। लक्खें सरकार कर्मचारियें दी तनखा पर रोक लग्गी सकदी ऐ। राष्ट्रपति डोनाल्ड ट्रम्प होरें चेतावनी दित्ती ऐ जे एहू इस माली संकट दा इस्तेमाल सरकारी कर्मचारियें दी छंटनी लेई करी सकदे ना। व्हाइट हाउस दी आधिकारिक वेबसाइट पर इक बैनर प्रदर्शित होआ जिस च लिखेअ दा हा जे डेमोक्रेट्स नै सरकार गी बंद करी दित्ता ऐ।

<><><><><><>

Maha Navmi

देश दे बक्ख-बक्ख हिस्सें च अज्ज दुर्गा नवमी मनाई जा'रदी ऐ। दुर्गा नवमी जिसी महानवमी बी आखेआ जंदा ऐ, नवरात्रि उत्सव दे नौमे ते अखीरी दिन दे रूपै च मनाई जंदी ऐ। अज्ज भक्त देवी दुर्गा दे नौमें ते अखीरी स्वरूप मां सिद्धिदात्री दी पूजा करदे ना। इस मौके प्रधानमंत्री नरेंद्र मोदी होरें लोकें गी ममारखां दित्तियां। इक सोशल

मीडिया पोस्ट च श्री मोदी होरें मेद प्रगट कीती जे नवरात्रि दा त्यौहार हर कुसै दे जीवन च खुशहाली, बेहतर भविष्य ते सफलता लेई आवे। झारखंड च दुर्गा पूजा महोत्सव बडे गै जोशो-खरोश कन्नै मनाया गेआ। महानवमी दे मौके पर लोकें 9 दिन व्रत रक्खियै अज्ज अखीरी ध्याडे मां दुर्गा जी गी प्रसन्न करने गितै हवन कीता। पारम्परिक अनुष्ठान ते प्रार्थना मां गी प्रसन्न करने गितै 9 दिनें कीता गेआ। कंजक ते कन्या पूजन कई सारी थाहें पर आयोजित कीता गेआ। रांची, जमशेदपुर, हजारीबाग, धनबाद, बोकारो ते पलामू जिलें च पूजा पंडाल सजाए गए हे ते मां दियां मूर्तियां सजाइयां गेदियां हियां। विजय दशमी लेई सारी तैयारियां कीतियां गेदियां न।

<><><><><><>

Yatra-Darshan

इनें नराते च अजें तगर 1 लख 70 जहार शा बद् यात्रु श्री माता वैष्णो देवी दे मंदर च हाजिरी लाई चुके दे न। श्राइन बोर्ड दे मुख कार्जकारी अधिकारी सचिन कुमार वैश्य होरें इस गल्ला दी जानकारी दिंदे होई आखेआ जे अज्ज महानौमी दे पवित्र मौके पर देस भर थमां भक्त माता वैष्णो दे दर्शन आस्तै आवा करदे न। बोर्ड नै सब्बनें आस्तै सुरक्षित, सखल्ली ते अरामदेय तीर्थ यात्रा यकीनी करने आस्तै सुद्दे बंदोबस्त कीते देन। रंगीन फुल्लें कन्नै कीती गेदी सजावट गी दिक्खियै यात्रुएं आखेआ जे एह्दे कन्नै उंदी यात्रा यादगीर बनी गेई ऐ।

<><><><><><>

Railway-Resumption

त्यौहारी सीजन शा पैहले यात्रुएं गी इक्क बड्डी राहत दिंदे होई उत्तर रेलवे नै कल्लै थमां इस महीने दी 8 तरीक तगर जम्मू थमां 16 ट्रेनें गी परतिये रम्भ करने दी घोशणा कीती ऐ। इस बरै अगस्त महीने च आए दे बडे मते हाडें करियै नेकां मुख रस्ते च रूकावटां पेई गेइयां हियां जिस कारण एह् ट्रेन सेवा आरजी तौरा पर बंद हियां। आकाशवाणी दे जम्मू संवाददाता नै खबर दिती ऐ जे नुकसान पुज्जे दे पुलें दी मरम्मत दा कम्म हुन पूरा होई चुके दा ऐ जिस करियै रेल गड्डियें दी आओजाई मुमकन होई सकी ऐ। बहाल कीती जा'रदी सेवां च जम्मू तवी कानपुर, गुवाहाटी, सियालदाह, योगनगरी ऋषिकेष्ट ते होर दुइयां सेवां शामिल न। तोआई, जम्मू रेलवे स्टेशन पर नमें बनाए जा'रदे ओवरब्रिज दा कम्म 70 फीसद शा मता पूरा होई चुके दा ऐ। लिफ्टें ते मती भाशाएं दे बोर्डे आह्ला एह् पुल यात्रुएं दी सुरक्षा ते सखाल गी बदाने च असरदार भूमिका निभाग।

<><><><><><>

Earthquake-Phillipines

मध्य फिलीपीन्स च आए दे भूचाल च मरने आहलें दी गिनतरी बढिये 69 होई गेई ऐ। फिलीपीन्स दे नागरिक सुरक्षा दफ्तर मूजब प्रशासन अजें बी लापता लोकें दी पंछान दी तस्दीक करा करदा ऐ। उनेंगी मलबे च अजें बी लोकें दे फंसे दे होने दियां सूचना थोआ करदियां न। फिलीपीन्स दे मध्य विसाय क्षेत्र दे समुंद्री कंडे आहले शहर सेबु च कल राती 6.9 तीव्रता दे आए दे विनाशकारी भूचाल च 150 शा मते लोक जखमी होए दे न।

<><><><><><>

Weather

मौसम विभाग नै कल्लै थमां लेइये इस महीने दी 4 तरीक तगर पूर्वोत्तर भारत च बरखा च बाद्दा होने ते किश थाहरें पर बडी मती बरखा बरने दी पेशगोई कीती ऐ। मैहकमे मताबक छत्तीसगढ, समुंद्री कंडे आह्ला आंध्र प्रदेश, सौराष्ट्र ते कच्छ इच अगले 2-3 दिनें दुरान किश थाहरें पर बडी मती बरखा बरने दा अंदाजा लाया गेआ ऐ।

<><><><><><>

Budgam Off. Attached

बक्खवादी ते गैर कनूनी गतिविधियें पर इक्क बड्डी कार्रवाई करदे होई बडगाम पुलिस नै बंदिशशुदा संगठन तहरीक-ए-हुर्रियत दे सदर दफ्तर गी गैर कनूनी गतिविधियां रोकथाम अधिनियम यू.ए.पी.ए तैहत कुर्क करी लैता ऐ। एह् कार्रवाई राश्ट्र बरोधी तत्वे पर लगाम कस्सने ते खेत्तर च अमन-रमानदारी बनाए रखने लेई चला करदियें कोश्टें तैहत कीती गेई ऐ। अधिकारियें दस्सेआ जे परिसर दा इस्तेमाल यू.ए.पी.ए. दे प्रावधानेंदी खलाफवर्जी करदे होई गैर कनूनी गतिविधियें लेई कीता जा करदा हां इस कार्रवाई कन्नै पुलिस नै राश्ट्री सुरक्षा ते लोकें दी हिफाजत गी ठेह पुजाने आहली गतिविधियें च शामिल संगठनें ते औदे मिम्बरें खलाफ सख्त कार्रवाई करने दी अपनी बचनबद्धता गी दोहराया।

<><><><><><>